

CELEBRACIÓN EN OS COTOS (na igrexa)

11 – 12 de setembro do 2021

XXIV DOMINGO DO TEMPO ORDINARIO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO DA COMUNIDADE

SAÚDO DE BENVIDA

🎵 n° 4 *Amigos nas penas e na festa amigos*

Celebrante:

Benvidos sexamos todos a esta celebración da nosa fe. Reunímonos para compartir a Xesús e o seu xeito de vivir dando unha man en comunidade; facémolo no nome do Pai e do Fillo e do Espírito Santo.

E vós quen dicides que son Eu? Pregúntanos Xesús no Evanxeo.

Moitas veces queremos facer un Xesús á nosa medida. Lemos o Evanxeo e pensamos que podería dicir ou facer algo que nos gustara máis.

O mesmo lle pasou a Pedro. Co cariño e a confianza que lle tiña, foille chamar a atención por dicir que tiña que sufrir a paixón.

Xesús deixaralle ben clariño cal é a súa misión e cal é o noso camiño se queremos seguilo.

Quen é Xesús para cada un de nós? Pretendemos facer un Xesús á nosa medida ou aceptámolo tal como se nos presenta no evanxeo e queremos seguir os seus pasos?

Respondamos hoxe con sinceridade e vivamos en consecuencia coa nosa resposta. Xesús daranos a forza necesaria para poder seguir o seu mandato de amor na coherencia de saber que a fe sen feitos está morta.

ACTO PENITENCIAL

Celebrante *A vida de Xesús demóstranos que vale a pena compartir coas persoas dende a actitude do compromiso de cada día. Pero non sempre pomos o mellor da nosa parte, por iso hoxe, antes de máis nada queremos pedir perdón e refacer a nosa relación con Deus:*

Monitor/a:

- Perdón polas veces que non somos coherentes no que dicimos e no que facemos. Señor ten piedade de nós
- Perdón polas veces que non somos coherentes no que cremos e no que obramos. Cristo ten piedade de nós
- Perdón polas veces que non somos coherentes no que pensamos e no que vivimos. Señor ten piedade de nós

Celebrante: *Deus todopoderoso teña piedade de nós e dos que teñen un lugar no noso corazón e na nosa vida. Teña tamén misericordia con todas as persoas que están cheas de medos e dúbidas. A todos nos conceda o Señor o seu perdón e nos leve á vida eterna. Amén.*

ORACIÓN PROPIA DO DÍA

Celebrante *Busquemos, no silencio, o encontro con Deus e presentémoslle as nosas intencións para esta semana. Lembremos aos cristiáns que pretenden vivir a fe pero que non se queren comprometer. (silenzio)*

Celebrante:

Deus, Noso Pai, Creador e Señor do universo, óllanos con bondade, e fai que experimentemos o poder da túa misericordia, para nos dedicarmos de todo corazón a facer realidade o evanxeo.

Pedímoscho a Ti, Pai, por Xesucristo teu fillo, que vive e reina por sempre eternamente. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Monitor/a:

Na carta de Santiago que escoitamos estes domingos fálasenos continuamente da coherencia de vivir como cristiáns a nosa fe.

Xesús é coherente no que fai e no que di, por iso non admite que Pedro lle rife polo que está a predicar.

Leccionario II B páx 244 Sant 2, 14-18 LECTURA

LECTURA DA CARTA DO APÓSTOLO SANTIAGO

Irmáns benqueridos, que proveito lle trae a un dicir que ten fe, se non ten feitos? Acaso o poderá salvar esa fe? Se un irmán ou unha irmá andan espidos e necesitados do pan de cada día, e vai un de vós e dilles:

"ídevos en paz, quentádevos e fartádevos", pero non lles dá aquilo que lle cómpre ao seu corpo, que proveito levan? Pois o mesmiño pasa coa fe: se non ten feitos, leva a morte no seu cerne.

Pode dicir alguén: "ti tes a fe, eu teño os feitos". -Móstrame a túa fe sen feitos que eu polos feitos heiche de mostrar a miña fe.

Palabra do Señor

FE SIN OBRAS...



FE CON OBRAS...



♪ n° 7 *Andarei na presenza*

SALMO

(en pé) *Leccionario II B páx 245 Mc 8, 27-35 EVANXEO*

PROCLAMACIÓN DO SANTO EVANXEO SEGUNDO MARCOS

Daquela, ía Xesús cos seus discípulos cara ás aldeas de Cesarea de Filipo, e polo camiño preguntoulles:

- Quen di a xente que son eu?

Eles responderon:

- Uns, que Xoán Bautista; outros, que Elías; e outros, que algún dos profetas.

El preguntoulles a eles:

- E vós, quen dicides que son?

Respondeu Simón Pedro:

- Ti elo Mesías.

E prohibiulles diciren nada a ninguén.

Entón, con toda claridade, empezou a adoutrinalos acerca de que era preciso que o Fillo do Home padecese moito, e que o rexeitasen os anciáns, os Sumos Sacerdotes e mailos letrados; que o ían matar, e que aos tres días había resucitar.

Explicoulles isto con toda claridade. Entón Pedro, colléndoo á parte, empezou a rifarlle. Pero Xesús volvéndose cara aos discípulos, reprendeuno:

- ¡Arreda de min, Satanás, que ti non te me deixas guiar por Deus, senón polos homes!

E chamando á xente onda os seus discípulos, díxolles:

- Se alguén quere vir comigo, que renuncie a si mesmo, cargue coa súa cruz, e que me siga. Pois o que queira poñer a salvo a súa vida, perderaa; pero quen dea a súa vida por min e polo Evanxeo, ese poñeraa a salvo.

Palabra do Señor

(sentad@s) gardamos uns instantes de silencio para acoller a palabra no corazón



Nós temos que ser e dar exemplo para ser cribles

(en pé) **PROFESIÓN DA FE**
Celebrante Hoxe Cristo espera de nós unha resposta que esixe coherencia entre a nosa fe e a nosa vida.
Dicimos:

Creo, Señor, pero aumenta a miña fe

Monitor/a:

Crede en Deus Pai e Nai,
que nos crea libres á súa semellanza para amar e para respostar con feitos e palabras ao seu benquerer?

Creo, Señor, pero aumenta a miña fe

Crede en Xesús,
o seu fillo benquerido, que nos convida a seguir os seus pasos coa valentía de saber que é dando vida como nos enchemos de vida?

Creo, Señor, pero aumenta a miña fe

Crede no Espírito Santo,
que nos empuxa a ser coherentes enchendo con feitos a nosa fe?

Creo, Señor, pero aumenta a miña fe

Crede no Espírito Santo,
comunidade que ao longo da historia testemuña a Xesús como o Mesías e Salvador que dá plenitude á vida resucitando?

Creo, Señor, pero aumenta a miña fe

ORACIÓN UNIVERSAL

Celebrante Acudamos a Xesús, o Mesías, que se entregou na cruz para enchernos de vida, e dicimos:

ÉNCHENOS DE VIDA, SEÑOR

Monitor/a:

- ✓ Mira, Señor, polos pais e nais da nosa parroquia para que mostren con feitos a fe na que se comprometeron a educar os fillos. Recemos
- ✓ Mira, Señor, polos mozos e mozas da nosa parroquia para que sigan asumindo o protagonismo da súa vida dando razón do seu camiño de fe, con feitos. Recemos
- ✓ Mira, Señor, por todos nós que agora compartimos esta celebración, para que sexamos exemplo de vida e fe para os demais. Recemos
- ✓ Mira, Señor pobos que sofren e nos que non se respectan os dereitos e as liberdades, como Afganistán ou Haití. Recemos
- ✓ Mira, Señor, polas persoas que nos teñen dado un bo exemplo na vida, aínda que a vida mesma non lles fora un camiño doado. Recemos

Celebrante: Señor, atende a nosa voz, non nos deixes da túa man, pois en Ti confiamos e de Ti queremos ser e dar exemplo. Ti que vives e reinas por sempre eternamente. Amén

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: Entremos no corazón do Deus que é Pai deixándonos encher do seu amor sereno e cheo de tenrura, e con Xesús e o seu xeito de facer e rezar fagamos e recemos nós dicindo: NOSO PAI ...

SIGNO DA PAZ

Celebrante: Hoxe temos moito que mellorar porque demasiadas veces pretendemos facer realidade unha fe que non é crible. E non o é porque lle faltan feitos. Que lonxe isto do que nos propón Xesús. Sexamos cribles na paz, no respecto, na tolerancia, no esforzo, no sacrificio, na cruz. Sexámolo.

COMUÑÓN

Celebrante: Xesús reúnenos arredor da mesa da Eucaristía para que o descubramos no pan compartido cos irmáns. Participar nela é comprometerse con feitos, porque a fe, sen eles, está morta.

Ditosos nós que hoxe somos convidados a esta mesa do Señor.

Señor, eu non son merecente de que entres no meu fogar, mais unha palabra túa abonda para me salvar

 **nº 50** *Na tardiña baixa da vida*

4.- AVISOS E DESPEDIDA

ORACIÓN FINAL

Celebrante:

Señor, ti concediches a túa Igrexa os dons eternos. Axúdanos a medrar no evanxeo, de xeito que con palabras e feitos sexamos testemuñas da vida de Xesucristo, noso Señor. Amén

Xesús, o Mesías, preguntanos quen é El para nós. Que resposta lle podemos dar hoxe despois desta celebración?

Queremos dar unha resposta libre, coherente e responsable da nosa fe ante as persoas coas que convivimos?

Que saibamos escoller aquilo que encha o noso corazón de vida, que seguro nos dará razóns para vivir a nosa fe de forma coherente e comprometida para con Deus e os demais.

Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén.

Avísase das misas (ver folla do mes).



**“O camiño da FE
é un camiño de FEITOS”**

Palabras de hoxe na carta de Santiago



Nós temos que ser e dar exemplo